

URED ZA DRUŠTVENU BRIGU RIJASETA IZ I PROJEKTI MATERIJALNE POMOĆI I PODRŠKE

Ibrahim MALANOVIĆ

Ured za društvenu brigu Rijasetu IZ u BiH
ibrahim.malanovic@rijaset.ba

SAŽETAK: Ured za društvenu brigu pri Upravi za ekonomske i finansijske poslove Rijasetu Islamske zajednice u Bosni i Hercegovini novija je organizaciona jedinica u okviru Islamske zajednice. Autor u radu govori o djelovanju ovog Ureda od osnivanja 2014. do 2022. godine, a potom predstavlja značajnije projekte Ureda, njegove područne aktivnosti i saradnike s kojima Ured realizira humanitarne akcije. Svoje mnogobrojne projekte Ured realizira kroz deset fondova koje autor u radu ukratko predstavlja. Na kraju rada autor ukazuje na izazove koji stoje pred Uredom za društvenu brigu u narednom periodu.

Ključne riječi: Ured za društvenu brigu, Uprava za ekonomske i finansijske poslove, Rijaset, Bejtul-mal, humanitarni rad

Djelovanje Ureda za društvenu brigu Rijasetu IZ od osnivanja 2014. do danas

Reorganizacijom Rijasetu Islamske zajednice u Bosni i Hercegovini 2014. godine, na prijedlog uvaženog reisul-uleme dr. Husein-ef. Kavazovića, formiran je Ured za društvenu brigu pri Upravi za ekonomske i finansijske poslove Rijasetu Islamske zajednice u Bosni i Hercegovini. S obzirom na to da se radilo o potpuno novoj organizacionoj jedinici, u prvoj godini djelovanja usvojen je niz normativnih akata kako bi se osiguralo da Ured provodi predviđene aktivnosti u skladu s Pravilnikom o radu Rijasetu. Uredu je dato u zadatak da dijeli dio sredstava od zekata i sadekatul-fitra iz Bejtul-mala, koji kur'anskom odredbom

pripada siromasima i nevoljnicima. Ta zadaća se vrši na osnovu usvojenih formulara i pravilnika Rijasetu, koji je imenovao i komisije za raspodjelu sredstava iz fondova na transparentan i pravedan način. Od samog osnivanja, primarni cilj Ureda se ogledao u disperziji adekvatne pomoći osobama u stanju potrebe. Ured raspolaže jednom osminom (1/8) sredstava iz Bejtul-mala, raspoređenih u različite fondove.

U proteklih osam godina (2014-2022) Ured je realizirao niz projekata u cijeloj Bosni i Hercegovini, kao i izvan domovine. Vršeci svoju primarnu zadaću, pomažući onima koji su u stanju socijalne potrebe, Ured doprinosi dobrom imidžu Islamske zajednice u Bosni i Hercegovini u njenom organiziranom i prepoznatljivom radu.

Putem Ureda se gradi mreža saradnika i prijatelja koji žele učestvovati u dobru. Uspostavljen da odgovori potrebama onih kojima je pomoć potrebna, Ured u svome djelovanju uključuje i različita udruženja, privredne subjekte i pojedince, te na taj način inovira svoje aktivnosti, s ciljem da pomoć i podrška dođu do što većeg broja ljudi.

Prve aktivnosti Ureda povezane su s pomaganjem pogođenih prirodnim nepogodama, poplavom i klizištima, koje su pogodile našu zemlju 2014. godine. Poslije toga Ured je inicirao i realizirao mnogo društveno korisnih projekata, od kojih izdvajamo sljedeće:

1. Program prevencije ovisnosti za koordinatoru, imame i vjeroučitelje na područjima svih muftijstava;

2. Organizacija seminara pod nazivom "Unapređivanje prava osoba s invaliditetom u Bosni i Hercegovini";
3. Imenovanje koordinatora za društvenu brigu u svim muftijstvima, te komisija za socijalna pitanja u medžlisima i za pitanja potreba širokog spektra socijalnih kategorija u društvu;
4. Uvođenje vaučera/bonova koji se dodjeljuju osobama u stanju potrebe, kako bi se izbjegle određene zloupotrebe;
5. Na inicijativu reisul-uleme, revitaliziranje Gazi Husrevbegovog imareta u kojem je organizirana svakodnevna podjela 50 obroka socijalno ugroženim građanima;
6. Projekt "Pomoć starijim i iznemoglim osobama – kućna njege" realizira se na području šest muftijstava (Sarajevsko, Zeničko, Mostarsko, Tuzlansko, Travničko, Bihaćko), a njegov poseban efekt postignut je u periodu pandemije COVID-19;
7. Putem Ureda se pruža pomoć i podrška u vanrednim okolnostima (zemljotresi, požari, poplave, klizišta, pandemija i dr.).

Ured godišnje obradi oko 3.500 pismenih i na stotine usmenih zahtjeva za pomoć socijalno ugroženim građanima s područja cijele Bosne i Hercegovine. Za svoj rad odgovoran je Upravi za ekonomske i finansijske poslove Rijasetu.

Značajnije aktivnosti Ureda za društvenu brigu

Aktivnosti Ureda su konstantne i transparentne. U nastavku donosimo kratak pregled nekoliko značajnijih aktivnosti:

- a) Islamska zajednica je putem Ureda za društvenu brigu osigurala više od 2,7 miliona KM za sanaciju šteta od poplava u Bosni i Hercegovini 2014. godine.
- b) Na godišnjem nivou se izdvajaju stotine hiljada KM iz

Fonda Bejtul-mal učenicima i studentima za stipendije i pomoći za školovanje.

- c) Osigurana su znatna sredstva za liječenje sirijskih izbjeglica i edukaciju djece u školama u Turskoj.
- d) U saradnji s Međunarodnim forumom solidarnosti "Emmaus", MDD "Merhamet", Društvom Crvenog krsta/križa BiH i Crvenog križa Federacije BiH, pružana je kontinuirana finansijska i pomoć u preradevinama od kurbanskog mesa koje su distribuirane među migrantima.
- e) U saradnji s Vakufskom direkcijom, Ured za društvenu brigu svake godine osigura pet hiljada ramazanskih paketa.
- f) U saradnji s državnim i humanitarnim organizacijama kao što su Ministarstvo vakufa i islamskih pitanja Katar, Qatar Charity, WAMY, Turski crveni polumjesec, Kulturni centar Kralj Fahd i dr. godišnje se dodjeljuje oko deset hiljada paketa širom Bosne i Hercegovine, a za osobe u stanju socijalne potrebe.
- g) Svake godine realizira se projekt "Hiljadu ramazanskih paketa", u saradnji s BBI bankom.
- h) Ured je nosilac projekta "Hiljadu bajramskih paketića za mektebske polaznike u povratničkim džematima", ali i za određena udruženja za pomoć djeci s poteškoćama u razvoju i za predškolske ustanove.
- i) Posredstvom Ureda za društvenu brigu i Vakufske direkcije, Islamska zajednica u Bosni i Hercegovini je donirala sredstva za nabavku neurofeedback aparata za Udruženje "Mali svijet" u Lukavcu, koje brine o razvoju djece s autizmom.
- j) Realizirana je podjela školskih torbi i pribora za učenike u povratničkim mjestima.
- k) Pružana je kontinuirana podrška organizacijama "Emmaus" i centrima "CROPS" i Suhodol,

Edukativnom centru u Novoj Kasabi u kojem se školuju bošnjačka djeca iz Konjević Polja, te istom centru u Vrbanjcima.

- 1) Pružana je podrška u vanrednim okolnostima, kao što su zemljotresi u Albaniji, Hrvatskoj i Stocu u Bosni i Hercegovini, pomoć u sanaciji šteta od požara, poplava, klizišta, pandemije i dr.

Ostale izdvojene aktivnosti

U dosadašnjem periodu Ured za društvenu brigu kontinuirano je provodio i druge aktivnosti poput:

1. Dodijeljeno je 30 krava, od kojih 15 u saradnji s udruženjem "Oh Sweet Ummah" iz Engleske.
2. Realiziran je projekt dodjele platenika za 78 korisnika na području Sarajevskog, Mostarskog, Travničkog, Zeničkog i Banjalučkog muftiluka, u saradnji s međunarodnom organizacijom "Islamic Relief".
3. Izvršena je dodjela poljoprivrednih mašina na područjima Janje, Bijeljine i Goražda, u saradnji s HO "Udruženje za blagostanje".
4. Osigurano je 30 invalidskih kolica, doniranih od turske HO "Be Aid" sa sjedištem u Belgiji, namijenjenih za pacijente u bolnicama i invalidne osobe.
5. U saradnji s Vojnim muftijstvom, prigodno su darovani kadeti Oružnih snaga Bosne i Hercegovine za uloženi trud u sticanju primarnih vještina na obuci.
6. Vršena je priprema i podjela ramazanskih iftara, u saradnji s javnom kuhinjom "Stari Grad" u Sarajevu i Svjetskom asocijacijom muslimanske omladine "Wamy".
7. Realiziran je projekt "Iftari za socijalno ugrožene".
8. Izgrađena je kuća šestočlanoj povratničkoj porodici Sokolović u selu Hrenovica, općina Pale-Prača, u saradnji s Mešihatom IZ u Sloveniji).

Aktivnosti Ureda u periodu pandemije COVID-19

Rijaset je tokom pandemije virusa COVID-19 posredstvom Ureda izdvojio značajna novčana sredstva za podršku medicinskim timovima koji su iz Bosne i Hercegovine boravili u Sandžaku, da bi poduprli tamošnje napore u suzbijanju širenja virusa. Ured je dodijelio hiljade maski, vizira i zaštitne opreme zdravstvenim ustanovama u Bosni i Hercegovini, Crnoj Gori i Srbiji. Tokom ramazana u vrijeme pandemije realiziran je projekt "Iftari na kućnu adresu". Pružana je svakodnevna podrška i pomoć pojedincima, udruženjima i ustanovama pogođenim pandemijom, a iskazana je i posebna briga prema starijim i iznemoglim osobama.

Fondovi i podfondovi Ureda za društvenu brigu

Sredstva iz Bejtul-mala, kojima Ured raspolaže, raspoređena su u fondove. U nastavku rada ukratko ćemo ih predstaviti.

Fond za osobe u stanju socijalne potrebe

Jedan od najznačajnijih jeste Fond za pomoć osobama u stanju socijalne potrebe. Ova pomoć se upućuje preko džematskih imama, koji najbolje poznaju potrebe svojih džematlija. Na osnovu zahtjeva i dostavljene dokumentacije, te preporuke mjesnog imama, Komisija za dodjelu socijalne pomoći predlaže dodjelu jednokratne pomoći prema potrebi, a shodno raspoloživim sredstvima. Uglavnom je većina zahtjeva opravdana i Ured nastoji odgovoriti pozitivno, vodeći računa o ravnomjernoj raspodjeli tokom cijele godine. Pored novčane pomoći, dodjeljuju se i bonovi/vaučeri, koje korisnici mogu iskoristiti u trgovačkom lancu Bingo i kupiti sve artikule osim alkohola i duhanskih proizvoda. Također, stalni vid pomoći su prehrambeni i higijenski paketi, koji se dodjeljuju tokom cijele godine.

Fond za fidju i kefaret

Kako veliki broj vjernika, posebno u dijaspori, živi i radi u mjestima u kojima ne poznaje muslimana siromaha koji može biti korisnik fidje, Vijeće muftija je na svojoj petnaestoj redovnoj sjednici, održanoj u Sarajevu 21. marta 2018. godine, donijelo fetvu o dozvoli institucionalnog prikupljanja i raspodjeli fidje i kefareta, čime Islamska zajednica u Bosni i Hercegovini ne mijenja suštinu fidje i kefareta, jer njihovi korisnici i dalje ostaju isti, tj. siromasi i nevoljnici, ali se njome omogućava vjernicima da na lakši, sigurniji i svrsishodniji način izvrše spomenute vjerske obaveze.

U fondu za fidju i kefaret sva sredstva se usmjeravaju za potrebe siromašnih u toku ramazana, najčešće podjelom iftara i humanitarnih paketa.

Fond za pomoć društveno korisnim udruženjima i organizacijama

Islamska zajednica u Bosni i Hercegovini u promociji dobra saraduje s odgovornim i korisnim organizacijama i udruženjima, novčano pomažući njihove projekte i rad. Ured u svom registru ima oko 150 udruženja, organizacija i ustanova kojima pomaže. Neki od njih su: Udruženje Pokret "Majke enklave Srebrenica i Žepa", JU Zavodi Drin i Bakovići Fojnica, Udruženje "Sreća za sve" Travnik, "Udruženje paraplegičara i oboljelih od dječije paralize" Goražde, JU Specijalna biblioteka "Behram-beg" Tuzla, JU CROPS Smoluća-Lukavac, Udruženje "Žrtava i svjedoka genocida", Udruženje paraplegičara, oboljelih od dječije paralize i ostalih invalidnih lica Bijeljina, JU "Centar za djecu i odrasle osobe s posebnim potrebama" Zenica, Udruženje slijepih i slabovidnih osoba Bužim, Savez Udruženja gluhih i nagluhih FBiH, Udruženje "Zlatna ruka" Ilidža, KJU "Dom za socijalno-zdravstveno zbrinjavanje" Sarajevo, JU "Studentski centar" Sarajevo, Studentski centar IZ u BiH, MDD "Merhamet" Sarajevo, Banja Luka, Prijedor, KJU "Gerontološki centar" Sarajevo, zatim brojni vrtići i centri za socijalni rad.

Fond za prerađevine kurbanskog mesa

Ured za društvenu brigu, po osnovu sporazuma s grupacijama Akova Sarajevo i Bajra o preradi kurbanskog mesa, raspolaže jednim dijelom prerađevina od tog mesa, kojim pomaže gore navedene organizacije, udruženja, javne kuhinje, staračke domove, škole, vrtiće i druge ustanove.

Fond za pomoć migrantima

Od same pojave migrantske krize, Islamska zajednica u Bosni i Hercegovini se aktivno uključila u pružanje pomoći ugroženim osobama iz ove kategorije ljudi, nabavkom hrane, lijekova i sanitetskog materijala. I danas Ured aktivno djeluje na ovom polju dodjelom donacija organizacijama koje direktno rade s migrantima, kao što su Crveni križ, "Merhamet" i MFS "Emmaus".

Fond za stipendije

Sredstvima iz ovog fonda pomažu se mladi ljudi koji stječu znanja. Prioritet imaju studenti i učenici s boljim prosječkom ocjena i lošijeg socijalnog statusa, oni koji dolaze iz višečlanih porodica, djeca iz jednoroditeljskih porodica, djeca bez oba roditelja ili djeca čiji su roditelji nezaposleni. Svake godine Rijaset u septembru raspisuje javni konkurs za dodjelu stipendija, na koji pravo prijave imaju svi redovni učenici srednjih škola i redovni studenti javnih fakulteta. Zvanični rezultati konkursa objavljuju se na službenoj stranici Islamske zajednice (islamskazajednica.ba). Odlukom Rijaseta, godišnje se dodjeljuje 200 stipendija za studente, učenike srednjih škola i učenike i studente s poteškoćama u razvoju. Pored ovih, dodjeljuje se i deset stipendija učenicima i studentima iz Sandžaka. Prema odluci Rijaseta, dodjeljuju se i stipendije za pobjednike na takmičenju iz *sire* – poznavanja životopisa Muhammeda, a.s. Također, deset stipendija dodjeljuje se učenicima u Srebrenici koji borave u Dnevnom centru MFS "Emmaus" u Potočarima, a određeni broj stipendija namijenjen je i za Dječiji dom u Mostaru. Značajno je napomenuti da je u vrijeme

pandemije COVID-19 dodijeljena pomoć za školovanje studentima iz drugih država: Kosova, Albanije, Palestine, Crne Gore, Sirije, Gane, Pakistana, Turske, Slovenije itd, a koji su se zatekli u teškoj situaciji zbog tada poznatih okolnosti. Godišnje se, pored stipendija, podijeli oko 300 drugih oblika pomoći za školovanje. Iz ovog fonda se izdvajaju i stipendije za magistarske i doktorske studije. Nerijetko se Uredu za društvenu brigu javljaju bivši stipendisti, koji su u životu ostvarili značajna postignuća, te putem zekata ili priloga žele pomoći njegov rad.

Fond za pomoć povratnicima i povratničkim medžlisima

Od završetka Agresije na našu zemlju i povratka muhadžira na svoja ognjišta, Islamska zajednica je u okviru fonda Bejtul-mal osnovala poseban fond isključivo namijenjen za pomoć povratnicima, povratničkim džematima i medžlisima. Poznato je da je tokom Agresije na Bosnu i Hercegovinu devastirano i uništeno 614 džamija. Zajednica je uspjela obnoviti većinu njih, a Fondom za pomoć povratničkim medžlisima kontinuirano se pomaže oko 120 džemata na području 55 medžlisa u Bosni i Hercegovini. Vratiti se na uništena imanja značilo je početi iznova, pa je Ured posebno osjetljiv na zahtjeve koji stižu iz povratničkih sredina, a na koje se nastoji pozitivno odgovarati.

Fond za pomoć porodicama imama šehida

Putem ovog fonda pedeset supruge imama šehida prima mjesečnu naknadu, simboličnu ali važnu, jer Zajednica i na taj način pokazuje da žrtva imama šehida nije zaboravljena. Rijaset je značajnom broju ovih porodica pomogao u rješavanju stambenih pitanja, stipendiranju djece i pomoći u liječenju.

Fond za liječenje imama i pomoć penzionisanim imamima

Oko 300 imama penzionera prima minimalnu penziju, nedovoljnu za osnovne životne potrebe. Rijaset

je oformio ovaj fond da se, makar simbolično, pomogne ovoj kategoriji. Reislul-ulema posebno ističe brigu o imamima, te se putem ovog fonda pruža pomoć u njihovom liječenju. Nakon zahtjeva i preporuke muftija ili glavnih imama, Ured distribuira pomoć imamima. U toku ramazana imamima penzionerima se kao hedija dodjeljuje iznos u visini dvije njihove prosječne penzije.

Fond "Fir-rikab"

Ovo je poseban fond iz kojeg se pomažu porodice koje su se zbog specifičnih okolnosti našle u veoma teškoj socijalnoj situaciji.

Projekt pomoć starijim i iznemoglim osobama

Krajem 2019. godine urađen je u Rijasetu predložen pilot-projekt za područja Sarajeva i Zenice: "Pomoć starijim i iznemoglim osobama – kućna njega", koji je kasnije proširen na još četiri muftijstva. Tako je od početka 2020. godine na području šest muftijstava obavljeno više od 5.000 posjeta u saradnji s imamima, mualimama, mrežom mladih i aktivistima odjela za brak i porodicu i volonterima. Danas se ovaj projekt realizira u Sarajevu, Zenici, Tuzli, Mostaru, Travniku i Bihaću, uz moto iz kur'anskog ajeta: *Smiluj im se, kao što su se oni nama smilovali.*

Saradnja s organizacionim jedinicama Islamske zajednice u Bosni i Hercegovini

Saradnja s upravama, uredima, odjelima Rijasetu IZ, muftijstvima, medžlisima, kao i drugim organizacionim jedinicama Islamske zajednice u Bosni i Hercegovini koje su direktno ili indirektno vezane za realizaciju projekata i aktivnosti Ureda za društvenu brigu, pretpostavka je za njegov uspješan rad. Posebno ističemo uspješnu saradnju s imamima, koordinatoricama odjela za brak i porodicu i mrežom mladih, jer su to najbolji poznavaoци potreba vjernika u

džematima. Dostignuti nivo saradnje Ureda s drugim organizacionim jedinicama Islamske zajednice potrebno je unapređivati i jačati uz međusobno uvažavanje i poštovanje.

Saradnja s trećim licima u realizaciji projekata

Ured za društvenu brigu Rijasetu Islamske Zajednice ostvaruje saradnju s humanitarnim organizacijama, centrima za socijalni rad, domovima za djecu bez roditeljskog staranja, javnim ustanovama (škole, vrtići, bolnice i domovi zdravlja), studentskim domovima, domovima za smještaj starijih i iznemoglih osoba, općinama i mjesnim zajednicama. Mreža saradnika Ureda kontinuirano se širi, a prijatelji Ureda širom zemlje i svijeta prepoznali su njegovu plemenitu misiju otvorivši vrata za saradnju poput: HO Qatar Charity, Ministarstvo vakufa i islamskih pitanja Katar, WAMY, TIKA, turski Crveni polumjesec, Ambasada Narodne Republike Kine u BiH, Kulturni centar "Kralj Fahd", Asocijacija medicinskih radnika "BIMA" i mnogi drugi. S pomenutim institucijama i organizacijama Ured nastoji doprinijeti boljem položaju ranjivih i marginaliziranih kategorija stanovništva u našem društvu.

Medijska prezentacija aktivnosti Ureda za društvenu brigu

Jasno, blagovremeno i kvalitetno, Ured razmjenjuje informacije s novinarima Media centra Islamske zajednice u BiH (Radio-televizija BIR, IIN *Preporod*, preporod.info i MINA). Ured na kraju svake godine biltenom o aktivnostima nastoji predstaviti svoj rad u toku protekle godine. Međutim, eksterno komuniciranje prema masovnim medijima vrlo je osjetljivo i zahtjevno jer Ured, čuvajući dostojanstvo osoba koje pomaže, nerijetko ne objavljuje detalje o njima. Aktivnosti humanitarno-socijalnog karaktera jesu misija Ureda, ali Ured ne može zadovoljiti sve socijalne potrebe naših

korisnika o kojima bi se sistemski trebala brinuti država. Koliko su sredstva Ureda ograničena pokazat ćemo na primjeru sarajevske općine Centar, koja, po klasifikaciji budžeta za 2022. godinu, u fondu "socijalna zaštita" na raspolaganju ima 1.727.348 KM namijenjenih za područje te općine, dok Ured za društvenu brigu ima znatno manja sredstva za istu namjenu za prostor cijele Bosne i Hercegovine.

Izazovi u realizaciji projekata Ureda za društvenu brigu

Veliki izazov je neadekvatan skladišni prostor Ureda, potreban zbog prihvata, sortiranja, čuvanja, kao i distribucije, prije svega, artikala iz humanitarnih donacija. Ovaj problem posebno je izražen tokom jeseni za vrijeme akcije prikupljanja zekata na poljoprivredne proizvode koji se usmjeravaju za ishranu korisnika odgojno-obrazovnih ustanova Islamske

zajednice i za pomoć humanitarnim organizacijama i socijalno ugroženim građanima. Svakako je potrebno raditi na povećanju sredstava kojima Ured raspolaže, a kako bi se pozitivno odgovorilo na zahtjeve za pomoć. Da bi i simbolično zadovoljio potrebe svih svojih korisnika, posebno stipendista, Ured neprestano ulaže napore na prikupljanju sredstava koje kasnije distribuira korisnicima, čime se postiže opća društvena korist.

الموجز

مكتب الرعاية الاجتماعية في رئاسة المشيخة الإسلامية ومشاريع المساعدات والدعم المادي

إبراهيم مالانوفيتش

يعتبر مكتب الرعاية الاجتماعية لدى إدارة الشؤون الاقتصادية والمالية في رئاسة الإسلامية في البوسنة والمهرسك من الوحدات التنظيمية الحديثة في المشيخة الإسلامية. يتحدث الكاتب في هذا المقال عن أنشطة هذا المكتب منذ إنشائه في عام 2014 وحتى عام 2022، ثم يعرض مشاريع المكتب الأكثر أهمية وأنشطته الإقليمية، والمتعاونين الذين ينفذ المكتب معهم الحملات الإنسانية. ينفذ المكتب مشاريعه العديدة عبر عشرة صناديق، يعرضها الكاتب بإيجاز في هذا المقال. وفي الخاتمة يشير الكاتب إلى التحديات التي تواجه مكتب الرعاية الاجتماعية في الفترة المقبلة.

الكلمات الرئيسية: مكتب الرعاية الاجتماعية، إدارة الشؤون الاقتصادية والمالية، رئاسة المشيخة، بيت المال، العمل الإنساني.

Summary

THE OFFICE FOR SOCIAL CARE OF THE RIYASAT OF THE ISLAMIC COMMUNITY AND ITS PROJECTS FOR THE MATERIAL ASSISTANCE AND SUPPORT

Ibrahim Malanović

The Office for Social Care as a part of the Directorate for economic and financial affairs of the riyasat of the Islamic Community in Bosnia and Heryegovina is a yung organizational unit of the Islamic Community. The author here relates of the unit's activities from the time of its foundation in the year 2014 to the year 2022, presenting the outlines of significant projects of this Office, its field activities, and the list of cooperators the Office is working with in its humanitarian activities. Numerous projects of this Office are carried out through the ten funds which are briefly presented in this article. The author concludes by pointing out the challenges facing the Office for Social Care in the upcoming period.

Keywords: Office for Social Care, Directorate for Economic and Financial Affairs, Riyasat, Baytu-l-mal, humanitarian activities